

Nehemías

Quema ya quipixqui majtlactli huan nahui xihuitl para mocueptoya Esdras ipan itlal, Tlanahuatijquetl Artajerjes quitequitlali Nehemías ma eli gobernador ipan Judá huan ma mocuepa nozona huan sempa ma quichijchihua nopa tepamitl catli quiyahualo Jerusalén. Nehemías tlahuel motemachi ipan TOTECO mojmotla huan yeca huelqui quijiyohui nochi nopa tlahuicayotl catli oncac quema quisencahuayaya nochi catli sosolijtoc ipan Jerusalén. Ni amatlapohuali nojquiya techilhuía inintoca miyac masehualme catli tequipanojqe ipan nopa tepamitl para sempa quisencahuase cuali.

Nehemías quiyiya nahui partes:

Nehemías 1—2 Nehemías mocuepa ipan Jerusalén.

Nehemías 3—7 Sempa quichijchijque nopa tepamitl catli quiyahualo Jerusalén.

Nehemías 8—10 Quipohua Icamanal TOTECO tlamiyacapa huan sempa quiompa-huía nopa camanal sencahuali ica TOTECO.

Nehemías 11—13 Sequinoc tlamantli catli Nehemías quichijqui.

Nehemías motlatlajti por israelitame

1 Ya ni nopa camanali catli na, niNehemías, niicone Hacalías, niqijcuilohua.

Ipan metztli Quisleu ipan toisraelita calendario^a, quema Tlanahuatijquetl Artajerjes yohuiyaya para 20 xihuitl tlanahuatis ipan tlali Persia, na niNehemías nitztoya ipan nopa hueyi altepetl Susa ipan icaltlanahuatil pampa nijtequipanohuayaya nopa tlanahuatijquetl. **2**Huan nechpaxaloco se noisraelita icni catli itoca Hanani, huan ihuaya hualajque sequinoc israelita tlacame tlen tlali Judá. Huan niquintlatzintoquili quenicatza eltoya ica nopa israelitame catli achtihui quínhuicatojay ilpitoque hasta nozona Babilonia, huan tepa sempa quincahuilijque ma mocuepaca altepetl Jerusalén. **3**Huan injuanti nechnanquilijque: “Se hueyi pinahualistli quen itztoque nopa israelitame catli sempa mocueptoque Jerusalén. Nelía tlaijiyohuáj

miyac. Mocahua sosolijtoc altepetl Jerusalén, huan nopa tepamitl huetztoc huan ipuertas nochi tlatlatoc.”

4Huan quema na nijcajqe nochi ya ni, nimosehui huan nichocac. Para miyac tonali nimotequipacho, huan nimosajqui, huan nimotlatlajti ica Toteco Dios catli itztoc ipan ilhuicac. **5**Huan niquilhui:

TOTECO, ta tiDios catli tiitztoc ilhuicac, nimitztlatlanía chicahuac techtlacaquili. Ta tlahuel tihueyi hasta titemajmati. Ta tijchihua nochi catli tijtencahua tiquinchiuilis moconehua. Tlahuel tiquinicnelía nochi catli quichihuj motlanahuatil. **6**Pero techtlacaquili na, nimotequipanojca, catli yohuali tonali nimitztlatlanía por tiisraelitame catli timotequipanojcahua. Ni moiximati ica ta quen na huan nochi tiisraelitame tlahuel titlajtlacolchijtoque moixpa. **7**Tlahuel timotzontochonchijtoque ica ta, huan amo tijneltocatoque

^a1:1 Elqui huejcajya ipan se metztli diciembre ipan tocalendario tlen ama.

motlanahuatilhua, niyon moleyes, niyon sequinoc tlamachtli catli techmacac huejcajya ica motequipanojca Moisés.

⁸Xiquelnamiqui catli ta tiquilhui Moisés. Tiquijto sintla tiisraelitame tirlajtlacolchihuasquíaj, huajca techsemanasquía huan techcahuasquía campa hueli ipan nochi tlaltipactli. ⁹Pero sintla timoyolcuepasquíaj sempa huan tijnelto-casquíaj motlanahuatilhua, huajca mas-que timopantisquíaj huejca, techhualic-ascquía huan techsansejcotilisquía sempa ipan Jerusalén, nopa altepetl catli ta tijtlapejpenijtoc para elis moaxca.

¹⁰Tojuanti timotequipanojca huan catli techmanahujtoc huan techchijtoc timoaxca huan ica mohueyi chicahualis. ¹¹Huan nimitztlajtlanía TOTECO para xijtlacaquili catli nimitztlajtlanía huan xiquintlacaquili mocone huan catli mitzhueyichihua ica paquillistli. Techpahui para nopa tlanahuatijquetl ma quita para cuali catli niqijtohua huan ma nechtlasojtla quema niyas niquilhuiti ni tlamantli.

Quej nopa na niNehemías niquilhui TOTECO. Na catli nijtequipanohuayaya nopa tlanahuatijquetl. Nijpixqui nopa tequitl para nijyecos nochi itlajjilis quema ayamo quijiyaya sintla se quitlajtoya ipajyo.

Artajerjes quicahuili Nehemías ma yohui Jerusalén

2 Teipa quema panotoya nahui metztli huan eliyaya ipan metztl Nisán ipan toisraelita calendario^b, na nijhuiquili ixomeca atl nopa tlanahuatijquetl huan nimanzi yaya nechitac para nimotequipachohua pampa amo quema nechitztoya quej nopa. ²Huajca nechtlatzintoquili:

—¿Para tlen timotequipachohua? Amo nesi sintla timocohua. Techilhui tlaque cuesoli tijpiya.

Huajca masque tlahuel nimajmahuiya, ³nijnanquili:

—Tlanahuatijquetl, xiitzto para nochipa. ¿Para tlen amo nimotequipachos quema quitlahuelcajtoque nopa altepetl Jerusalén campa motlalpachojque nohuejapan tatahua? Nochi sosolijtoc huan ipuertas tlatlatoc.

⁴Huan nopa tlanahuatijquetl nechtlatzintoquili:

—¿Tlaque tijnequi para ma nijchihua?

Huajca na nimotlatlajti ica Toteco Dios para ma techpahui, ⁵huan niquilhui:

—Sintla tiquita para cuali huan sintla hueyi moyolo ica na, huajca techtitlani ipan tlali Judá campa notatahua motlalpachojque para huelis nijcualchijchihuati nopa altepetl.

⁶Huan nopa sihua tlanahuatijquetl mosehujtoya ihuaya nopa tlanahuatijquetl quema nicamanaltic. Huan nopa tlanahuatijquetl nechilhui:

—Huan ¿quesqui tonali monequis timocahuas? ¿Quema timocuepasquía?

Huajca na niquilhui quema niyas huan niquixquetzqui se tonal quema nimocuepasquía. Huan yaya quipacti huan nechtitlanqui. ⁷Huan nojquiya niquilhui: “Sintla mitzpacría, techmaca amatlajcuiloli para nopa gobernadores ipan seyoc nali hueyatl Eufates para nechcahuase nipanos inintlal para huelis niajsiti tlali Judá. ⁸Huan nojquiya techmaca seyoc amatlajcuiloli para Asaf catli quinmocuitlahua nochi cuamili catli moaxca para ma nechmaca cuahuitl catli monequi para tlaquetzalme, huan para puertatlas ipan nopa cali catli nelchicahuac inacastla nopa hueyi israelita tiopamitl. Huan nojquiya ma nechmaca cuahuitl para puertatlas ipan itepa nopa altepetl huan para se cali para na.” Quej nopa niquilhui. Huan nochi ya nopa nechmacac nopa tlanahuatijquetl pampa na nimotemachijtoya ipan Toteco Dios.

⁹Huan teipa quema niajsito iniixpa nopa tlanahuatiani tlen seyoc nali hueyatl Eufates, niquinmactili nopa amatlajcuiloli catli nechmacatoya Tlanahua-

^b 2:1 Elqui se tonali huejcajya ipan se abril o mayo ipan tocalendario tlen ama.

tijquetl Artajerjes. Huan itztoyaj nohuaya miyaqui tlayacanani tlen soldados catli nopa tlanahuatijquetl quintitlantoya para ma nechmocuitlahuica. Sequin cahuyojtipan nemiyayaj huan sequin san icxi nejmeyayaj. ¹⁰ Pero quema quimatque nochi ya ni, Sanbalat catli ejqui Horón huan Tobías catli ejqui Amón, tlahuel cualanque pampa ajsitoya se catli motemacatoya para quinpalehuis israelitame.

Nehemías ajsic altepetl Jerusalén

¹¹ Huan niasjic ipan altepetl Jerusalén huan quema ya niitztoya eyi tonali nozona, ¹² niquisqui ica tlayohua huan niqinhuicac se quesqui tlacame nohuaya. Huan amo aqui niquilhui catli Toteco Dios quitlalijtoya ipan noyolo para nijchihuasquía ipan altepetl Jerusalén. Huan niyohuiyaya ipan se burro huan nopa tlacame nechtoquiliyaya icxinejmij. ¹³ Huan ipan nopa yohuali tiquisque nopa altepetl campa itoca nopa Tlamayamitl Puerta, huan tiyajque campa nopa ameli catli itoca Dragón huan sempa tiyajque campa seyoc puerta catli itoca Tlasoli Puerta. Huan niquitac nochi nopa tepamitl catli huetztoya huan nochi nopa puertas catli tlatlatoya. ¹⁴ Huan teipa tiyajque campa nopa puerta catli itoca Ameli Puerta, huan teipa tiajsitoy ipan nopa ameli tlen nopa tlanahuatijquetl. Huan nozona amo huelqui panoc noburro pampa tlahuel tlafero. ¹⁵ Teipa nopa tlayohua ninejntiyajqui hasta campa nopa huactoc atentli huan quej nopa nijyahualo nochi nopa altepetl. Huan niquitac nochi quenicitatza eltoya huan nimocuepqui sempa campa nopa puerta campa niquistejqui.

¹⁶ Huan nopa tequitini amo quimatque canque niyajtoya huan tlaque nijchihuyaya pampa ayamo tleno niqinilhuijtoya tlen catli nimoilhuijtoya para nijchihuasquía. Amo tleno niqinilhuijtoya noisraelita icnihua, niyon nopa totajtzitzi, niyon tequitini, niyon tlayacanani, niyon nopa sequinoc tlacame catli teipa quichihuasquía nopa tequitl.

Nehemías quinyolchicajqui masehualme para tequitise

¹⁷ Pero teipa niqinnotzqui nochi nopa israelitame huan niqinilhui:

—Amojuanti cuali anquimatij para tlahuel tlafero quen tiitztoque nica ipan ni altepetl pampa nochi tlamisosolijtoc. Huetztoque nochi tepamitl huan ipuertas tlatlatoque. Huajca ama ma tijpehualtica ti-tequitise huan tijcualchijchihuase nochi para ayacmo aqui hueli techpinajtis.

¹⁸ Huan teipa niqinilhui quenicitatza Toteco Dios nechpalehuijtoya pampa hueyi iyolo. Niqinilhui nochi catli nechilhuijtoya nopa tlanahuatijquetl huan quenicitatza nechajqui ma nihuala hasta Jerusalén para nijchihuas nopa tequitl catli nimoilhuijtoya para nijchihuas. Huajca nochi inijuanti tlananquilijque:

—Cualtitoc, ma titequitica.

Huan nochi pejque tequitij ica miyac paquilistli. ¹⁹ Pero quema quimatque Sanbalat catli ejqui altepetl Horón, huan Tobías catli elqui se amonita tlatatl, huan Gesem nopa árabe tlatatl, inijuanti techpinajtique huan techcualancaitaque. Techilhuijque:

—¿Tlaque anquichihuj amojuanti? San anmoajcomanaj ica nopa tlanahuatijquetl huan anquiixpanoj.

²⁰ Huan na niqinnanquili:

—Ica itlapalehuil Toteco Dios catli quichijqui ilhuicactli, tojuanti, tiitequipanojcahua, tijcualchijchihuase ni altepetl. Pero amojuanti amo tleno anquipiyaj nica tohuaya huan amo huelis anmocalaquise ipan ni tlamantli.

Inintoca catli quicualchijchijque tepamitl

3 Huajca nopa totajtzi Eliasib huan iicnihua catli itztoyaj totajtzitzi pejque quicualchijchihuj nopa tepamitl campa itoca nopa Borrego Puerta. Quiiyocatlalijque nopa puerta para Toteco huan quiquetzque. Huan nojquiya quicualchijchijque nopa tepamitl hasta nopa huejcapantic tetzoptli catli itoca Torre Hananeel catli elqui para se tlamocuitlahuijquetl. ² Tlen nozona, quicualchijchijque nopa tepamitl nopa tlacame catli ejque altepetl

Jericó. Huan innacastla quicualchijchijqui Zacur, icone Imri.

³Huan iconehua Senaa quiquetzque itlaquetzalhua nopa Michi Puerta, huan quitlalijque nopa puerta ica nochi nopa huejhueyi lavos huan nopa teposbarra catli monequi para ma motzacua cuali. ⁴Huan innacastla quicualchijchijqui tepamitl Meremot, icone Urías huan iixhui Cos. Huan inacastla quicualchijchijqui Mesulam, icone Berequías huan iixhui Mesezabeel. Huan iquespa quicualchijchijqui nopa tepamitl Sador, icone Baana. ⁵Huan itepotzco tequitque tlacame catli ehuj altepetl Tecoa, pero catli tlayacani ipan Tecoa amo quinejque quinpalehuisse. ⁶Huan Joiada, icone Paseah, huan Mesulam, icone Besodías, quicualchijchijque nopa Puerta Sosoltic. Quiquejquetzque itlaquetzalhua huan quitlalijque nopa puerta ica nochi nopa huejhueyi lavos huan teposbarras. ⁷Huan campa tlanque inintequi ipan tepamitl, quicualchijchijque Melatías catli ehua altepetl Gabaón, huan Jadón tlen altepetl Meronot, inihuaya tlacame catli ehuj altepeme Gabaón huan Mizpa. Nopa altepeme mocajqui ipan itlanahuatilis nopa tlanahuatijquetl ipan ne se nali hueyatl Eufrates. ⁸Huan innacastla quicualchijchijqui nopa tepamitl Uziel, icone Harhaía, nopa oro teposchijquetl. Huan inacastla quicualchijchijqui tepamitl Hananías catli quimatqui quichijchihua nochi tlamantli tlaajhuiyacayotl. Huan quen nopa quicualchijchijtiyajque itepa altepetl Jerusalén hasta campa itoca nopa Tepamitl Patlahuac. ⁹Ininnacastla quicualchijchijqui Refaías, icone Hur. Refaías elqui gobernador ipan tlajco altepetl Jerusalén. ¹⁰Huan inacastla Jedaías, icone Harumaf, tequitqui iixmelac ichaj. Huan inacastla quicualchijchijqui tepamitl Hatús, icone Hasabnías.

¹¹Huan iquespa quicualchijchijque Malquías, icone Harim, huan Hasub, icone Pahat Moab. Quicualchijchijque campa nopa huejcapantic tetzoptli catli itoca Torre Horno campa mocahuas se tlamocuitlahuijquetl para tlachiyas. ¹²Huan innacastla quicualchijchijque Salum, icone

Halohes, inihuaya iichpocahua. Salum eliyaya gobernador ipan ne seyoc tlajco altepetl Jerusalén.

¹³Huan Hanún huan nopa masehualme catli ehuj altepetl Zanoa quicualchijchijque nopa Tlamayamitl Puerta. Quiquejquetzque itlaquetzalhua huan quitlalijque nopa puerta ica nopa huejhueyi lavos huan nopa teposbarras. Nojquiya quicualchijchijque 450 metros tlen tepamitl huan tlamitoj nechca campa nopa Tlasoli Puerta. ¹⁴Huan nopa Tlasoli Puerta quicualchijchijqui Malquías, icone Recab. Malquías elqui gobernador ipan nopa municipio itoca Bet Haquerem. Quinquetzqui tlaquetzalme huan quitlali nopa puerta ica nopa huejhueyi lavos huan nopa teposbarras.

¹⁵Huan Salum, icone Colhoze, catli elqui gobernador ipan nopa municipio Mizpa quicualchijchijqui nopa Ameli Puerta. Cualí quisencajqui ica tlaquetzalme huan quitzontzajqui. Teipa quitlali ipuertas ica huejhueyi lavos huan nopa tepos barra. Huan yaya nojquiya quicualchijchijqui nopa tepamitl hasta nopa Ameli Siloé huan tlamito campa huejcayja elqui ixochimil Tlanahuatijquetl David huan hasta campa temo nopa escalones tlen Ialtepe David. ¹⁶Teipa campa yaya itequi tlanqui, quicualchijchijqui Nehemías, icone Azbuc, catli eliyaya gobernador ipan tlajco nopa municipio Bet Sur. Huan yaya quicualchijchijqui hasta iixmelac campa motlapacho David, huan hasta campa eltoya nopa ameli. Huan tlamito itequi hasta campa achtihuiya elqui Ininchaj Nopa Soldados Catli Más Motemacaj.

¹⁷Huan inacastla quicualchijchijque nopa tepamitl nopa levitame catli tequitiyayaj imaco Rehum, icone Bani. Huan innacastla, Hasabías nopa gobernador ipan tlajco nopa municipio Keila tequitqui para imunicipio. ¹⁸Huan inacastla, quicualchijchijque nopa tepamitl ihuampoyohua catli tequitiyayaj imaco Bavai, icone Henadad, catli elqui gobernador ipan ne seyoc tlajco nopa municipio Keila. ¹⁹Huan innacastla quicualchijchijqui nopa tepamitl Ezer, icone Jesús, catli el-

qui gobernador ipan tlajco nopa municipio Mizpa. Yaya tequitqui iixmelac nopa tlaixtemolis campa nopa cali campa qui-ajoctoya nochi tepostli para ica tlahuila-nase nozona nopa moixnamiquiyaya nopa tepamitl. ²⁰Huan inacastla Baruc, icone Zabai, pejqui quicualchijchihua seyoc achi ipan nopa tepamitl tlen campa moixnamijqui hasta ipuerta ichaj Eliasib, nopa hueyi totajtzi. ²¹Huan inacastla, tequitqui Meremot, icone Urías huan iixhui Cos. Yaya quicualchijchijqui nopa tepamitl tlen ipuerta totajtzi Eliasib hasta campa itlamia-ya ichaj.

²²Huan iquespa quicualchijchijque nopa tepamitl nopa totajtzitzi catli ejque nopa tlamayamitl nechca hueyatl Jordán. ²³Huan ininnacastla tequitque Benjamín huan Hasub. Inijuanti quicualchijchijque nopa tepamitl catli mocahuayaya ininca-lixpa. Huan ininnacastla tequitqui Azarías, icone Maazías huan iixhui Ananías. Yaya quicualchijchijqui catli nechca ichaj. ²⁴Huan inacastla tequitqui Binúi, icone Henadad. Yaya quicualchijchijqui nopa tepamitl tlen ichaj Azarías hasta campa monamijqui nopa tepamitl ipan esquina. ²⁵Huan Palal, icone Uzai, quicualchijchijqui nopa tepamitl iixmelac nopa esquina huan ipan nopa huejcapantic tetzoptli para se tlamocuitlahuijquetl. Nopa tetzoptli quisa ipan ichaj nopa tlanahuatijquetl huan mocahua inacastla icalixpa nopa tlatzactli. Huan inacastla tequitqui Pedaiás, icone Faros. ²⁶Huan inacastla, quicualchijchijque nopa tepamitl nopa tiopa tequipanohuani catli ejque nopa tepetl Ofel. Inijuanti quisencaque nopa tepamitl hasta nopa Atl Puerta catli mocajqui campa hualquisa tonati tlen nopa huejcapantic tetzoptli para se tlamocuitlahuijquetl catli quisqui ipan tepamitl. ²⁷Huan ininnacastla tequitque tlacame catli ejque altepetl Tecoa. Inijuanti quicualtlalijque seyoc parte nopa tepamitl tlen iixmelac nopa tetzoptli catli huejcapantic hasta nopa tepamitl campa nopa municipio Ofel.

²⁸Huan ininquespa tequitque nopa totajtzitzi. Inijuanti quicualchijchijque nopa tepamitl iajco nopa Cahuayo Puerta huan

sesen tequitqui iixmelac ichaj. ²⁹Huan ininnacastla tequitqui Sadoc, icone Imer. Yaya quicualchijchijqui iixmelac ichaj. Huan inacastla tequitqui Semaías, icone Secanías, catli nojquiya quimocuitlahui nopa Puerta Campa Hualquisa Tonati. ³⁰Huan iquespa tequitque Hananías, icone Selemías, huan Hanún, ichicuasempa cone Salaf. Huan nechca ya tequitqui Mesulam, icone Berequías. Yaya quicualchijchijqui nopa tepamitl iixmelac ichaj. ³¹Huan inacastla tequitqui nopa oro teposchijquetl Malquías. Yaya quicualchijchijqui nopa tepamitl hasta nopa cali campa mocajque tlanemacani huan catli tequipanojque tiopan calijtic. Malquías tequitqui iixmelac nopa Puerta Campa Teltajtolxitlahuaj huan hasta nopa cuarto catli huejcapa nechca campa moixnamiquiyaya nopa tepamitl. ³²Huan nopa sequinoc tlacame catli itzttoyaj oro teposchihuani huan tlanemacani quicualchijchijque nopa tepamitl tlen nopa cuarto catli huejcapa hasta nopa Borrego Puerta.

Inincualancaitacahua quinpinahualtijque catli tequitqui

4 Huan quema quimatqui Sanbalat para tijcualchijchihuayayaj nopa tepamitl catli quiyahualo nopa altepetl, tlahuel cualanqui. Huan pejqui techpinahualtía tiisraelitame. ²Huan tlamiyacapa iniixpa ihuampoyohua huan nopa tlayacanca tlacame tlen tlali Samaria, Sanbalat quijto: “Pilteicneltzitzi ni israelitame. Huelis moilhuáj para nimantzi tlamise quicualchijchihuase inialtepe. ¿Huelis moilhuáj sempa huelise quitlatise tlacajcahalistli nica? Xiquitaca quen quiquixtíaj tetl catli ya tlatlatoc huan sempa quitequihuáj.”

³Huan inechca itztoya Tobías nopa amonita tlatatl catli quijto: “Xiquitaca quenicatza nelyamanic nopa tepamitl catli quicualchijchihuaj. Sintla tlejcos se cayochi ipani, quitlamisosolos.”

Nehemías motlatlajti

⁴Huajca na nimotlatlajti huan niqijto: “Toteco Dios, xijcaqui quenicatza techpinajtíaj. Xijchihua para nochi catli inijuanti

ti techilhuíaj ma eli para injuanti. Ma huetzica ininmaco inincualancaitacahua huan ma quinhuicaca ilpitoque para tetequipanose ipan sequinoc tlamle. ⁵Amo xiquintlapojpolhui inintlajtlacolhua huan amo xiquelcahua catli quichijtoque pampa quintzinquixtíaj ni tlacame catli tequitij.”

Inincualancaitacahua quinmajmatijque

⁶Tijcualchijchijque nopa tepamitl hasta titlantoyaj tlajco ihuejcapanca, pampa tequitque ica miyac paquili. ⁷Huan Sanbalat, Tobías huan nopa sequinoc árabe huan amonita tlacame ininhuaya nopa tlacame tlen altepetl Asdod quimatque catli tijchihuayaj. Quimatque tijsenhuiquilijtoyaj tijcualchijchihua nopa tepamitl huan tijtemitijayaj campá sosolijtoc, huan yeca tlahuel cualanque. ⁸Huan sentic quisencajque para ajsise ipan altepetl Jerusalén ica soldados para techhuilanaquij huan quisosolose totequi. ⁹Huajca tojuanti timotlatlajtijque ica Toteco Dios, huan tiquintlalijque tlamocuitlahuiani para techmocuitlahuise yohuali tonali para timomanahuise tlen injuanti. ¹⁰Teipa nopa israelitame tlen tlali Judá pejque quijtohuaj para ya siyajtoque nochi catli tequitijayaj ipan nopa tepamitl huan noja polihuiyaya miyac tequitl. Huan quijtojque para amo tiyajatise para tijcualchijchihuase nochi nopa tepamitl.

¹¹Huan tocualancaitacahua quijtohuayaj para calaquisquíaj ipan toaltepe ichtacatzí quema amo tiquinchiyayaya huan techmictise. Quej nopa quijtojque, quiquetzasquíaj totequi. ¹²Huan nopa israelitame catli itztoyaj ininnecha hualajque techilhuicoj miyac hueltas para tocualancaitacahua hualayaj tlen campá huehli para techhuilanaquij. ¹³Huajca niquntlali masehualme ica ininfamilias ma tlamocuitlahuica iica nopa tepamitl campá más echcapantzi huan campá tlacoyontoya. Huan quihuicayaj ininmachete, inincuatlamin catli huehueyac huan inincauhuitol para ica momanahuise. ¹⁴Teipa quema niquitac quen nochi momajmatiyayaj, huajca nimoquetzqui huan niquinca-

manalhui nopa tlayacanani, tequitini huan nochi nopa masehualme, huan niquntlali: “Amo xiquinimacasica. Xiquelnamiquica para Toteco nelhueyi huan temajmati. Huajca xitlahuilanaca por amocinhuaya, huan amoconehua, huan amosihuajhua huan amochajchaj.” Quej nopa niquntlali.

¹⁵Huan quema tocualancaitacahua quimatque para Toteco Dios technextilijtoya catli quichihuasnequiyayaj huan tijmachiliyayaj, ayacmo huelque calaquisepampa tiquinchiyayaj. Huajca ayacmo tleno techchihuilijque huan nochi tojuanti timocuepque sempa ipan totequi. ¹⁶Huan tlen nopa tonali, san tlajco tlacame tequitijayaj, huan tlajco tlamocuitlahuiyayaj ica machetes, cuatlamintli catli huejhuehueyac, cuahuitoli huan cuatlamintli. Huan injuanti moquentijayaj inintepos yolixtzajcahua. Huan nopa tlayacanca soldados moquetzque iniica nopa israelitame tlen tlali Judá ¹⁷catli quicualchijchihuyayaj nopa tepamitl. Huan nopa tlacame catli tlamamayaj tequitijayaj ica se ininmax huan ipan seyoc quihuicayayaj inintepos. ¹⁸Huan nochi catli tepanchihuani tequitijayaj ica ininmachete motzinquechilpitoyaj. Huan yaya catli quimatqui quipitza tlapitzali mocajqui nonacastla. ¹⁹Huan niquntlali nopa tlayacanani, tequitini huan nochi nopa sequinoc masehualme: “Tlahuel hueyi ni tequitl huan timoxelojtoque huan timopantíaj huejca campá titequitij, ²⁰huajca campá anquicaquisepampa tlapitzali, nozona xiyaca para ximosansejcotilitij nohuaya para tiquinhuilanaquij tocualancaitacahua huan Toteco Dios tlahuilanas por tojuanti.”

²¹Tipehuayaj titequitij quema tlane-siyaya huan tijsenhuiquilijayaj hasta quema ya tlayohua huan quema monextiyaya sitlalime. Huan tlajco tlen tojuanti titlamocuitlahuiyayaj ica tepostli. ²²Huan nojquiya niquntlali nopa masehualme catli ejque ipan sequinoc altepeme para injuanti huan inintequipanojcahua ma mochahuaca ipan altepetl Jerusalén para cochise para nojquiya ma techpalehuica

timopatlatiyase titlamocuitlahuise ica tlayahua huan quema tonaya titequitise. ²³Huan niyon na, niyon noicnihua, niyon notequipanojcahua huan niyon aqui catli itztoyaj nohuaya amo timoquixtiliyayaj toyoyo huan nochipa tijpixque toteposhua nechca tomox.

**Quintzacuilijque inincualancaitacahua
catli yoltetique**

5 Teipa miyaqui tlacame huan sihuame pejque quintelhuáj sequin israelita tlacame catli tominpixtoyaj pampa quintlajtlaniyayaj miyac tomi iniisraelita icnihua. ²Quiijtohuayayaj: “Tojuanti tlahuel timiyaquij ica nochi toconehua huan yeca monequi timotlanehuise trigo san para ica timopanoltise.” ³Sequinoc quiijtohuayayaj: “Ya tijtlaminemacatoque totlal, tomil, toxocomecamil huan tochajchaj ininmaco ni tlacame catli tominpiyaj para ma techtlanejtica tomi para amo timayancamiquise ipan ni hueyi mayantli.” ⁴Huan sequinoc quiijtohuayayaj: “Monejqui timotlanejque tomi para tijtlaxtlahuise ne tlana-huatijquetl nopa impuestos catli tlajtlani por tomil huan toxocomecamil. ⁵Huan masque tojuanti nochi tiisraelitame huan tiicnime ica san se toeso huan toconehua san se quen ininconehua, monequi tojuanti tiquinnemaquiltíaj toconehua para ma quintequipanoca para injuanti ma techtlanejtica tomi. Sequin toichpocahua ya tiquinnemacatoque para quintequipanose san tlapic huan ayacmo hueli titlaxtlahuase para tiquincuilise pampa totlal huan nochi catli tijpixtoyaj ayacmo toxca.”

⁶Huan quema na nijcajqui nochi catli nechilhuijtoyaj, tlahuel nicualanqui. ⁷Teipa nimonejnehuili quenicatza nijchihuas. Huan niyajqui huan niquinajhuac nopa tequitini huan nopa tominpiyani huan niquinilhui: “¿Quenque quej ni anquinchihuj amoisraelita icnihua? Amo xitlahuac para antlainamaj itlanca tomi huan anquincuilíaj inintlal.” Nojquiya niteyolmelajqui para tijchihuase se hueyi tlanechicoli para tijsencahuase ni tlamantli. ⁸Huan nojquiya niquinilhui para hasta campá tihuelque tiquincojtoyaj sempa to-

israelita icnihua catli quinnemacatoyaj ipan sequinoc tlalme. Huan ama sempa anquinnemacaj amoicnihua para ma tetequipanoca san tlapic. Huajca sempa monequi tiquincohuase para tiquinmanahuise.

Huan amo aqui nechnanquili pampa amo quimatque tlaque nechnanquilise. ⁹Huan na niquinilhui: “Amo cuali catli anquichihuj. ¿Quenque amo anquitlepanitaj Toteco Dios? ¿Quenque anquichihuj catli ica tocialancaitacahua techpinajtise? ¹⁰Na huan nochaj ehuan nojquiya tittlanejtijtoque tomi huan trigo, pero amo tiquintlajtlaniáj itlanca. Huajca amojuanti ayacmo xiquinamaca israelitame itlanca quema anquintlanejtíaj tomi. ¹¹Huan nojquiya nimechtlajtlanía para nimantzi xiquincuepilica ininmilhua, ininxocomeca milhua, iniolivo milhua, ininchajchaj huan nochi itlanca tomi catli anquinamayayaj por catli anquintlanejtijtoyaj.”

¹²Huan nochi injuanti tlananquili-que: “Tiquincuepilise nochi catli iniacxa huan amo tleno tiquininamase. Nochi catli tiquijtojtoc, tijchihuase.”

Huajca na niquinnotzqui totajtzitzi ma hualaca huan para injuanti ma motestigojquetzaca iniixpa para, quena, quichihuase quen quiijtojque. ¹³Teipa nijtzejtzeloyoyo huan niqijto: “Quej ni ma quichihua Toteco Dios nopa tlatatl catli amo quinequis quichihuas catli quiijtojtoc para quichihuas.”

Huan nochi tlananquili-que: “Quej nopa ma eli.” Huan quihueyichijque TOTECO huan quena, quichijque quen quiijtojtoyaj.

Nehemías quinpalehui imasehualhua

¹⁴Na nipejqui nitequiti quen gobernador quema Artajerjes yohuiyaya para 20 xihuitl tlanahuatis huan nechtitlanqui para nielis gobernador nica ipan tlali Judá. Huan nitequitqui 12 xihuitl hasta Artajerjes yohuiyaya para 32 xihuitl tlanahuatis. Huan ipan nochi nopa xihuitl quema niitztoya quen gobernador amo quema, niyon na, niyon noicnihua amo tijselijque nopa tlatlahuili catli techtocarohuayaya por

totlacualis o por totequi. ¹⁵Pero catli el-que gobernadores achthiuiya, quena, tlahuel quininanque israelitame huan quinahuatiyayaj ma quinhuilicualis inintlacualis huan ininxocomeca iayo mojmostla. Nojquiya quinnahuatiyayaj ma quinmacaca nechca tlajco kilo tlen plata. Huan hasta inintequipanojcahua nopa gobernadores nojquiya quinamamayaj. Pero na amo quema nijchijqui quej nopa pampa nijtlepanita Toteco Dios. ¹⁶Huan nojquiya na nitequitqui chicahuac para nijcualchijchihuas nopa tepamitl campa nechtocono. Amo nijcojqqui tlali huan nochi notequipanojcahua mosentilijque para tequitise mojmostla. ¹⁷Huan mojmostla ipan nomena niquintlamacayaya 150 israelitame huan tequitini. Huan iyoca ajsiyayaj nechpaxalohuaj tequitini catli hualajque ipan sequinoc tlalme catli monejqqui niquintlamacas. ¹⁸Huan mojmostla quisencahuayaj para totlacualis se hueyi toro, chicuase borregoyme catli tomahuaque huan miyac patojme huan huejhueyi totome. Huan sesen majtlaclti tonati titemacaque xocomeca atl hasta mocahuayaya, pero amo quema niqinilhui masehualme ma nechtlaxtlahuica pampa nigobernador pampa nijmatqui para nelía ohui para panose. ¹⁹Huan nimotlatlajti: “NoTeco Dios, xiquelnamiqui nochi catli cuali nijchijtoc ica ni masehualme huan techmaca motlatiochihualis.”

Tlacame quicualancaitacame Nehemías

6 Quema Sanbalat, Tobías, huan Gesem, nopa árabec tlatlatl, huan sequinoc tocualancaitacahuica quimatque para ya titlantoyaj tijcualchijchihuaj nopa tepamitl huan amo tleno más polihuiyaya, san monequiyaya cuapuestas tijtlatzquiltise, nelía cualanque. ²Huan Sanbalat huan Gesem nechtitlanilijque se amatlajcuiloli. Nechilhui ma nimosentili ininhuaya ipan se pilaltepetzi ipan nopa tlamayamitl catli itoca Ono. Pero na nijmachili para quinequiyayaj nechmictise, ³huajca na niquintitlanili tlayolmelahuani para quinilhuse: “Na nimotequihuía ipan se hueyi tequitl huan amo hueli nijcajtehuas. ¿Quenque

monequi moquetzas ni tequitl para niquisas huan nitemos campa amojuanti?” ⁴Huan inijuanti quej nopa nechtitlanilijque camanali nahui hueltas huan na san se niqinannquiluyaya.

⁵Teipa ica macuili hueltas Sanbalat quititlanqui itequipanojca ma nechhuilicualis seyoc amatlajcuiloli tlapojtoc ipan imax, ⁶huan ya nopa quijto:

Campa hueli nochi quimatij para ta huan nochi israelitame antlasencahuaj para anmoajcomanase ica totlanahuatijca huan yeca anquicualtlalíaj nopa tepamitl. San se nojquiya quijtohua Gesem. Nojquiya quijtohuaj para timochihuas tiinintlanahuatijca. ⁷Huan quijtohuaj para ya tiquintlalijtoc tlajtol pannextiani para ma quijtocha ipan altepetl Jerusalén para ta titlanahuatijquetl. Temachtli quimatis Tlanahuatijquetl Artajerjes nochi ni camanali catli nemi. Huajca más cuali xihuala huan ticamanaltise san tojuanti.

⁸Huajca na nijcuelpalti se amatlajcuiloli catli quijto: Amo tleno melahuac catli tiquijtojtoc. San tiistlacati. ⁹Inijuanti san quinequiyayaj techmajmatise para ayacmo tijchihuase nopa tequitl, pero na achi más nimoyolchicajqui. ¹⁰Teipa niyajqui nijpaxaloto Semaías, icone Delaía huan iixhui Mehetabel. Yaya senitztoya ipan ichaj huan amo huelqui quisa. Yaya quijto para Toteco Dios quinojnotztoya ma nechilhui ma timosentilica ipan tiopa calijtic huan ma tijzacuaca cuali nopa puertas huan ma timotlatica. Quijto para hualayaj tlacame nopa tlayohua para techmictiquij. ¹¹Huan na nijnanquili: “Tlacame quen na amo cholohuaj. Amo nitotajtzi para nicalaquis tiopan calijtic, niyon para nijmanahuis nonemilis, huajca amo niyas.”

¹²Huan na nimomacac cuenta para Toteco Dios amo quinojnotztoya. San quijtojtoya nopa camanali tlen nopantis quen elisquía se tlajtol pannextijquetl pampa Sanbalat huan Tobías quitlaxtlahuijtoyaj. ¹³Quitlaxtlahuiyayaj para ma nechmajmati para ma nijchihua catli amo monequi huan nitlajtlacolchihuas. Quej nopa quipiyasquaj

se camanali amo cuali tlen na para ma nech-telhuica. ¹⁴Huajca nimotlatlajti huan ni-quijto: “NoTeco Dios, xiquelnamiqui catli amo cuali quichijtoque Sanbalat huan Tobías. Nojquiya xiquelnamiqui catli fiero quichijtoque nopa sihua tlajtol pannextijquetl, Noadías, huan nochi nopa sequinoc tlajtol pannextiani catli quinequij nechmajmati-se.” Quej nopa nimotlatlajti.

Quitlamiltijque nopa tepamitl

¹⁵Huan tijtlamiltijque tijcualchijchihuaj nopa tepamitl ipan tonal 25 itequi nopa metztl Elul ipan toisraelita xihui^c. Huajca tlen ipejya totequi hasta tijtlamiltijque tijcualchijchijque nopa tepamitl ipan san 52 tonali. ¹⁶Huan quema quimatque tocualancaitacahua huan nopa masehualme ipan nochi tlalme catli quiyahualojtoque altepetl Jerusalén para tijtlamiltijtoyaj nopa tequitl, tlahuel momajmatijque pampa quimachilijque para san ica ichicahualis Toteco Dios tijtlamiltijtoyaj nopa tequitl.

¹⁷Huan ipan nopa 52 tonali tlayacanca tlacame ipan tlali Judá quititlaniliyayaj miyac amatlajcuiloli Tobías, huan nimantzi quincuepaltiyaya. ¹⁸Quej nopa quichijque pampa miyac tlacame tlen tlali Judá mote-macatoyaj ihuaya Tobías pampa imonta eliyaya Secanías, icone Ara. Nojquiya icone Tobías catli itoca Johanán mosihuaajtjtoyaya ihuaya iichpoca Mesulam, icone Berequías. ¹⁹Tlatoctzitzitzi nopa tlayacanca tlacame hualayayaj huan nechpohuiliyayaj para nelía se cuali tlatatl Tobías huan sempa yohuiyayaj quipohuiliyayaj Tobías nochi catli na ni-quijtohuayaya. Huan Tobías nojquiya nech-titlaniliyaya miyac amatlajcuiloli para nechmajmatis.

Hanani huan Hananías quimocuitlahuijque Jerusalén

7 Quema ya tijsencajttoyaj nopa tepamitl catli quiyahualo altepetl Jerusalén huan nochi ipuertas ya tijtlatzquiltijtoyaj, tiquitequimacaque puerta tlamocuitlahuiani, huicani huan levitame para tla-

mocuitlahuise. ²Huan niquitequimacac ma quiyipaya tlanahuatili ipan nopa altepetl noicni Hanani huan Hananías catli eliyaya capitán tlen soldados ipan nopa cuartel catli eltoya nozona. Hananías eliyaya se tlatatl catli nelía temachtlí huan quittepanitac Toteco Dios miyac huan amo quen sequinoc. ³Huan na niquinilhui: “Amo xijtlapoca cuapuestas tlen Jerusalén hasta quema ya quistos cuali tonati huan sempa xijtzacuaca nopa puertas quema noja itzose tlamocuitlahuiani. Huan xijtzacuaca nopa puertas cuali huan xijtlalica nopa hueyi teposbarra. Huan nojquiya xiquitequimacac tlacame catli Jerusalén ehuaní ma tlamocuitlahuica. Sesen ma quiyipaya itequi campa ta tijtlalis o nechca ichaj.”

Inintoca catli mocuepque tlen tlali

Babilonia

(Esd 2:1-70)

⁴Niquilhui ya nopa pampa nopa altepetl elqui tlahuel hueyi huan san quentzi masehualme itztoyaj ipani pampa ayamo oncayaya calme tlasencahuali. ⁵Huan Toteco Dios nechyoltacani para ma niqin-sentilis nochi tlayacanca tlacame, nochi tequitini, huan nochi masehualme para ma moijcuiloca por familias. Ya nicajsic se amatlapohuali ica inintoca catli achtihuiya mocueptoyaj huan ya ni catli nijpanti ijcuilijtoc ipani:

⁶Nica eltoc inintoca nopa israelitame catli ehuaní altepetl Jerusalén huan campa hueli ipan tlali Judá catli Nabucodonosor quinquicac tlali Babilonia para tetequipanotij huan teipa sempa mocuepque ipan Jerusalén huan nopa sequinoc pilal-tepetzitzitzi campa ejque. ⁷⁻²⁵Mocuepque ininhuaya nopa tlayacanani catli inintoca eliyayaj Zorobabel, Jesús, Nehemías, Azarías, Raamías, Nahamani, Mardoqueo, Bilsán, Misperet, Bigvai, Nehum huan Baana. Nica techilhuía ipan tlaque familia hualajque nopa tlacame huan quesqui injuanti mocuepque tlen nopa familia.

^c6:15 Elqui ipan se 2 itequi octubre ipan tocalendario tlen ama.

<i>Familia</i>	<i>Quesqui</i>	Levitame catli mocuepque
Paros	2,172	43 Mocuepque 74 levitame catli itztoyaj iixhuihua Josué por Jesús huan Cadmiel.
Sefatías	372	44 Mocuepque 148 huicani catli itztoyaj iixhuihua Asaf.
Ara	652	45 Mocuepque 138 tiopan puerta tlamocuitlahuiani catli itztoyaj iniixhuihua Salum, Ater, Talmón, Acub, Hatita huan Sobai.
Pahat Moab por Jesús huan Joab	2,818	46 Huan mocuepque tiopan calijtic tequipanohuani catli itztoyaj iniixhuihua: Ziha, Hasufa, Tabaot,
Elam	1,254	47 Queros, Siaha, Padón,
Zatu	845	48 Lebana, Hagaba, Salmal,
Zacai	760	49 Hanán, Gidel, Gahar,
Binúi	648	50 Reaía, Rezín, Necoda,
Bebai	628	51 Gazam, Uza, Paseah,
Azgad	2,622	52 Besai, Mehunim, Nefisesim,
Adonicam	667	53 Bacbuc, Hacufa, Harhur,
Bigvai	2,067	54 Bazlut, Mehída, Harsa,
Adín	655	55 Barcos, Sísara, Tema,
Ezequías por icone Ater	98	56 Nezá huan Hatifa.
Hasum	328	57 Huan mocuepque ininteipan ixhuihua itequipanojcahua Salomón catli inintoca eliyayaj: Sotai, Soferet, Perida,
Bezai	324	58 Jaala, Darcón, Gidel,
Harif	112	59 Sefatías, Hatil, Poqueret Hazebaim huan Amón.
Gabaón	95	60 Huajca ica nochi mocuepque 392 catli itztoyaj iniixhuihua tiopan calijtic tequipanohuani huan catli itztoyaj iniixhuihua itequipanojcahua Salomón.

26-38 Huan nica techilhuía inialtepe canque hualajque nopa tlacame huan quesqui inijuanti mocuepque tlen nopa altepetl.

<i>Altepetl</i>	<i>Quesqui</i>	
Belén huan Netofa	188	61 Huan ipan nopa tonali nojquiya mocuepque sequinoc tlacame tlen altepeme catli itoca Tel Mela, Tel Harsa, Querub, Adón huan Imer ipan tlali Persia, pero amo quipantijque inintoca ipan nopa amatlaphuali huan amo huelque quiixnextijque ajqueya inintata, niyon ininhueyi tata, niyon sintla nelía itztoyaj israelitame.
Anatot	128	62 Elque 642 tlen ni tlacame huan elque iixhuihua: Delaía, Tobías huan Necoda.
Bet Azmavet	42	63 Huan mocuepque totajtztizi catli itztoyaj iixhuihua Habaía, Cos, huan Barzilai catli monamicti ihuaya se iichpoca Barzilai tlen tlali Galaad huan quicuili itoca isihua.
Quiriat Jearim, Cafira huan Beerot	743	
Ramá huan Geba	621	
Micmas	122	
Betel huan Hai	123	
nopa seyoc altepetl Nebo	52	
nopa seyoc altepetl Elam	1,254	
Harim	320	
Jericó	345	
Lod, Hadid huan Ono	721	
Senaa	3,930	

Totajtztizi catli mocuepque

39-42 Huan nica techilhuía quesqui totajtztizi mocuepque tlen tlali Babilonia huan ipan sesen familia huan quesqui mocuepque:

<i>Familia</i>	<i>Quesqui</i>	
Jedaías	973	
Imer	1,052	
Pasur	1,247	
Harim	1,017	

64 Nochi ni totajtztzi quintemolijque inintoca ipan nopa amatlapohuali huan amo quipantijque. Huajca amo quinquemacaque quen totajtztzi pampa amo quimatque sintla tlapajpactique o amo. 65 Huan na nigobernador niquinilhui amo ma quicuaca tlacualistli catli tlatzejtzeltic para totajtztzi hasta quema quitlajtlanise TOTECO ica nopa piltetzitzi catli itoca Urim huan Tumim, nopa dados tlatzejtzeltic, para quimatise sintla eliyayaj totajtztzi o amo.

66 “Huajca ica nochi catli mocuepque ipan tlali Judá eliyayaj 42,360 masehualme. 67 Huan nojquiya mocuepque 7,337 inintequipanojcahua, tllacame huan sihuame. Huan mocuepque 245 huicani, tllacame huan sihuame. 68 Huan quinhualicatoyaj ininhuaya 736 cahuyajme, huan 245 mulas, 69 huan 435 camellos, huan 6,720 burrojme.

70 “Huan sequin tlayacanani ipan familias tlapalehuique ica tomi para nopa tequitl. Huan na catli nigobernador nitamacac 8 kilos huan tlajco tlen oro, huan 50 tazas, huan 530 ininyoyo totajtztzi. 71 Huan sequin tetajme ipan familias temacaque 170 kilos tlen oro huan 1,210 kilos tlen plata. 72 Huan nochi sequinoc catli itzttoyaj ipan nopa altepetl temacaque 170 kilos tlen oro, huan se mil cien kilos tlen plata, huan 67 ininyoyo totajtztzi.

73 “Huan teipa nochi totajtztzi, levitame, puerta tlamocuitlahuiani, huicani huan catli tequipanohuayaj ipan tiopamitl, huan nochi sequinoc israelitame mocuepque ipan inialtepe campa ejque huan mochantijque.”

Esdras tepohuili itlanahuatilhua Moisés

Huan quema ajsiyaya nopa metztli chicome ipan toisraelita xihui^d, nochi nopa israelitame ya quipixque ininchajchaj para ipan itztose sesen ipan ialtepe.

8 Huan ipan nopa achtihui tonal tlen nopa metztli chicome^e, nochi nopa masehualme quen san se tlatcatl mosenti-

lijque campa quichihuah tianquis ipan Jerusalem iixmelac nopa Atl Puerta. Huan quihuique tlamachtijquetl Esdras ma quihualica nopa amatlapohuali catli quipixqui nopa tlanahuatilme catli huejcayja TOTECO quinmacatoya israelitame ica Moisés para quipohuas iniixpa. 2 Huajca nopa totajtzi Esdras quihualicac nopa amatlapohuali iniixpa nopa tlasentililistli ipan nopa achtihui tonal ipan nopa metztli. Nopona itzttoyaj nochi tllacame, sihuame huan coneme catli huelyayaj tllamachilíaj. 3 Huan Esdras pejqui quipohua nopa amatlapohuali ica ijnaloc huan quipojqui hasta tlajco tona ipan nopa plaza catli eltoya iixmelac nopa Atl Puerta iniixpa nopa tllacame, sihuame huan nochi coneme catli huelqui quimachilíaj.

Huan nochi nopa masehualme tllacac toyaj para ma quimachilica cuali nopa tlanahuatilme catli TOTECO quinmacatoya. 4 Huan Esdras moquetztzoya tllaixpa huejcapa ipan se tllapechtli catli quicualchijchijtoyaj ica huapali para ipan ma moquetza para nochi huelise quiitase. Huan ipan nopa tllapechtli ipan inejmac moquetztzoyaj Matatías, Sema, Anías, Urías, Hílcías huan Maasías. Huan ipan iopochco moquetztzoyaj Pedaías, Misael, Malquíás, Hasum, Hasbadana, Zacarías huan Mesulam. 5 Huan Esdras quitlapo nopa amatlapohuali huan nochi huelyayaj quiitaj pampa itztoya huejcapa. Huan quema pejqui tllapohua, nochi nopa masehualme moquetzque. 6 Huan Esdras quipaquilismacac TOTECO, yaya Dios catli tllahuel hueyi huan nochi quinanquijque icamanal ica: “Quej nopa melahuac.” Huan momatlananque para ilhuicac. Teipa motlancuaquetzque huan mohuijtzonque hasta tllalchi huan quihueyichijque TOTECO.

7 Huan nopa levitame: Jesús, Bani, Serrebías, Jamín, Acub, Sabetai, Hodías, Maasías, Kelita, Azarías, Jozabed, Hanán huan Pelaía; quixtomayaj nopa tlanahuatilme catli quipohuayaya para nochi huelque quimachilíaj. 8 Huan inijuanti

^d7:73 Elqui huejcayja ipan octubre o noviembre ipan tocalendario tlen ama. ^e8:1 Elqui huejcayja ipan se 8 itequi octubre ipan tocalendario tlen ama.

quipojque chichahuac para nochi quicaquisquáaj huan teipa nopa levitame quinmactijque masehualme tlaque quinequi quijtos sesen tlamachtili para ma quimachilica cuali huan nochi huelque quimachilijque.

9 Huan nochi nopa masehualme chocayayaj quema quicaquiyayaj itlanahuatilhua TOTECO. Huajca na niNehemías nopa gobernador, huan Esdras nopa tlamachtijquetl huan nopa levitame tiquinilhuijque ma amo chocaca huan para nopa tonal eliyaya tlatzejzeloltic para TOTECO toDIOS huan para amo ma motequipachoca niyon amo ma chocaca. 10 Huan nojquiya Esdras quinilhui: “Xiyaca xiyolpactoca. Xijcuatij tlacualistli catli más cuali huan xiquijitij xocomeca atl catli más tzopelic. Nojquiya xiquintitlanilica tlacualistli catli teicnel-tzitzitzi huan amo tleno quipiyaj para quicuaitlalise. Ama ni tonal eltoc tlatzejzeloltic huan tlaiyocatlalili para Toteco. Amo ximotequipachoca pampa nopa paquilistli tijpiyaj ipan TOTECO catli techmaca chichahualistli.”

11 Huan nopa levitame nojquiya quinyoltlaliyajaj nopa masehualme huan quinilhuijque: “Amo ximotequipachoca pampa tlatzejzeloltic ni tonal para TOTECO.” 12 Huajca nochi nopa masehualme yajque para quicuatij huan quijitij catli más cuali huan quititlanque tlacualistli para catli teicnelztitzitzi. Huan nochi mopaquilismacaque huan ilhuichijque pampa quicactoyaj icamanal TOTECO catli quipohuilijtoyaj huan quinmactijtoyaj.

Quichijque nopa Ilhuitl tlen Pilxajcaltzitzitzi

13 Huan ipan seyoc tonal nochi catli tlayacanca tetajme, nopa totajtzitzitzi huan nopa levitame mosentilijque ihuaya nopa tlamachtijquetl Esdras para quipohuase ica más tlamocuitlahuili nopa amatlapohuali para noja más quimachilise. 14 Huan quipantijque nopa tlanahuatili campa TOTECO quinahuatijtoya Moisés para nochi israelitame ma quichihuaca pilxajcaltzitzitzi

sesen xihuitl huan ipan itztose ipan nopa Ilhuitl tlen Pilxajcaltzitzitzi. 15 Huajca quintitlanque tlayolmelahuani campa hueli ipan nochi altepeme huan ipan Jerusalén para ma teyolmelahuase. Quinilhuijque nochi israelitame ma quisaca quitemotij imacuayohua olivo cuame, apachi cuame, higo cuame o tlen hueli cuahuatl catli quipiya miyac ixihuiyo catli tlaecahuilía para ica mochantise quen TOTECO tlanahuatijtoya. 16 Huajca nochi israelitame yajque cuatitla quitemotij catli ica moxajcaltise. Huan nochi quichijque pilxajcaltzitzitzi inintzonatipa ininchajchaj, o ipan inincalixpa, o icalixpa tiopamitl, o ipan nopa plazas inixmelac nopa Atl Puerta huan Efraín Puerta. 17 Huajca nochi israelitame catli mocueptoyaj tlen campa quinhuicatojay tetequipanotij mocajque ipan nopa pilxajcaltzitzitzi catli quichijtoyaj para 7 tonali. Huan nochi tlahuel yolpajque para sempa quitoquilise nopa tlanahuatili catli amo nochime sentic quitoquilijtoyaj hasta quema Josué, icone Nun, huejcajya quinyacanayaya israelitame. 18 Huan ipan sesen nopa chicome tonali ipan nopa ilhuitl Esdras quipojqui nopa amatlapohuali catli quipixqui itlanahuatilhua Toteco Dios. Huan ipan tonali chicueyi quipixque se hueyi tlasentililistli para quihueyichihuase Toteco quen quijto tlanahuatili ma quichihuaca.

Israelitame mosajque huan quipohuilijque TOTECO inintlajtlacolhua

9 Huan teipa ipan tonal 24 itequi nopa chicometztlitzi ipan toisraelita xihui^f, mosentilijque nochi israelitame para mosahuase. Huan mosajque huan moquentijque yoyomitl catli fiero huan motlalilijque tlali ipan inintzonteco para quinextise inintequipachol por inintlajtlacolhua. 2 Huan moyocatlalilijque ica masehualme catli amo israelitame huan nochi moquetzque huan iixpa TOTECO quitenpojqque inintlajtlacolhua huan inintlajtlacolhua inintatahua. 3 Huan para eyi horas

^f9:1 Elqui huejcajya ipan se 31 itequi octubre ipan tocalendario tlen ama.

mojmostla injuanti mocajque ijcatoque huan se quinpohuili tlen nopa amatlapohuali ica itlanahuatilhua TOTECO Dios. Huan para seyoc eyi horas mojmostla quipohuilijque TOTECO Dios inintlajtlacolhua huan quihueyichijque. ⁴Huan tlahuejcapa ipan nopa escalones moquetzayayaj nopa levitame: Jesúa, Bani, Cadmiel, Sebanías, Buni, Serebías, Bani huan Quenani. Huan chicahuac quinojnotzayayaj TOTECO Dios. ⁵Huan teipa nopa tlayacanca levitame, Jesúa, Cadmiel, Bani, Hasabnías, Serebías, Hodías, Sebanías huan Petaías quinilhujque nopa masehualme: “Ximoquetzaca huan xijhueyichihuaca TOTECO Dios catli ipa itztoya para nochipa huan para nochipa itztos.” Huan quijtojqe:

“Nochi ma timitzhueyichihuaca huan ma timitzpaquilismacaca, TOTECO Dios, pampa ta tlahuel tihueyi huan tlahuel ticuajcualtzi. ⁶TOTECO, san ta tiiyojtzti ti-Dios huan amo aqui seyoc. Ta tijchijqui ilhuicac campa tiitztoc huan nopa ilhuicac tli campa sitlalime. San ta tijchijchijqui tlaltipactli huan nochi catli onca ipani. San ta tijchijchijqui nochi huejhueyi atl huan nochi catli nopona itztoque. Ta ti-quinmaca nemilistli nochi catli itztoque. Nochi tequihuajme ipan ilhuicac motlan-cuaquetzaj moixpa ta.

⁷“Ta tiTOTECO Dios catli tijtlapejpeni Abram huan tijquixti ipan tlali Ur, inintlal nopa caldeos huan tijtocaxtlali Abraham. ⁸Tiquitac para temachtli iyolo moixpa. Huan ihuaya tijchijqui se camanal sencahuali para tiquinmacasquía iixhuihua nopa tlalme catli iniaxcahua nopa cananeos, heteos, amorreos, ferezeos, jebuseos, huan gergeseos. Huan tijtlamichijtoc nochi catli tijtencajqui pampa nelía tixitlahuac.

⁹“Ta tiquitac quenicatza tlaijyohuiyayaj tohuejcapan tatahua ipan tlali Egipto. Tijcajqui quema mitztlajtlanjque tlapalehuili iteno nopa Hueyi Atl Chichiltic. ¹⁰Huan tijchijqui huejhueyi tlanextilijcayotl huan tiochicahual nextili iixpa Faración, huan nochi itequipanojcahua huan nochi tlen tlali Egipto ehuan. Tiquinmanahui israelitame ininmaco pampa tiquitac

quenicatza mohueyimatiyayaj Egipto ehuan huan quenicatza quinchihuiliyayaj catli fiero. Huajca tijchijqui para nochi masehualme ma mitziximatica huan hasta ama nochi mitziximatiyayaj para tlahuel hueyi mochicahualis. ¹¹Tijxelo nopa hueyi atl iniixpa huan nochi israelitame panoque tlajco hueyi atl ipan tlali huactoc. Huan nochi inincualancaitacahua tiquinmajcajqui campa más huejcatla quen quisuahúaj se tetl huan yohui hasta atzintla huan nopona mocahua. ¹²Tonaya tiquinacanqui ipan ojtli ica se hueyi mixtli huan tlayohua ica se hueyi tliilemectli para tlahujtiyas campa nejnentiyojhuuyayaj.

¹³“Ta tihualtemoc ipan nopa tepetl Sinaí, huan ticamanaltic ininhuaya israelitame huan tiquinmacac cuali tlamachtlime huan tlanahuatilme catli xitlahuac, huan catli melahuac huan catli cuali. ¹⁴Tiquinmacac tlanahuatilme ica quenicatza ma mosiyajquetzaca ipan sábadonopa tonal catli tlayocatlalili para ta. Quena, ica motequipanojca Moisés tiquinmacac tlanahuatilme huan tlamachtlime para ma quichihuaca. ¹⁵Tiquinmacac pantzi catli huetzqui tlen ilhuicac quema mayanayayaj. Huan quema amiquiyayaj, ta tijchijqui ma quisa atl ipan se tetl hueyi. Huan tiquinilhui ma calaquica huan ma moaxcatca nopa tlali catli tiquintencahuili tiquinmacasquía.

¹⁶“Pero tohuejcapan tatahua tlahuel mohueyimatque huan moyoltelijque huan amo quichihuiliyayaj cuenta motlanahuatil. ¹⁷Amo quinejque mitztlacaquillise. Amo quielnamijque nochi nopa tiochicahual nextili catli ta tijchijtoya iniixpa. Huajca motzonchichijque huan quitlalijque se tlayacanquetl para sempa quinhuicasquía ipan tlali Egipto campa tetequipanohuayayaj san tlapic. Pero ta, ti-Toteco Dios catli titetlapojpolhuía huan catli tijpiya hueyi moyolo. Ta amo niman-tzi ticualani. Titetlasojtla huan hueyi motlaicnelil, huajca amo tiquintlahuelcajqui.

¹⁸“Masque quichijque se becerro tlen oro, huan masque quijtojqe para ya inon elqui inindios catli quinquixti ipan tlali Egipto, huan tlahuel hueyi mitzmahuispo-

lojque, 19 ta catli tlhuel hueyi motlaicnelil, amo tiquincajtejqui ipan huactoc tlali campa amo tleno onca. Amo tiquinquixtili nopa hueyi mixtli catli quinyacanqui tonaya, niyon nopa tilelemectli catli quintlauili tlayohua para ma quimatica catli-que ojtli ipan yase. 20 Huan tiquinmacac moTonaltzi catli cuali para quinmachtis. Amo tiquinquixtili nopa maná catli eliyaya inintlacualis. Niyon amo tiquinquixtili atl quema amiquiyaya. 21 Para 40 xihuitl tiquinmacayaya nochi catli monejqui ipan nopa huactoc tlali huan amo tleno quinpolo. Ininyoyo amo sosolijqui huan iniicxihua amo sasamacaque.

22 “Tiquinpalehui para quintlanque miyac tlanahuatiani huan tlalme ica miyac ininmasehualhua. Tiquinmacac tlalme hasta nopa nepamitl catli más huejca. Moaxcatijque Hesbón catli eliyaya itlal Tlanahuatijquetl Sehón huan moaxcatijque Basán catli eliyaya itlal Tlanahuatijquetl Og. 23 Huan tiquinmiyaquili ininconeuhua quen elisquáaj sitlalime ipan ilhuicac. Huan tiquinhualicac ipan ni tlali catli tiquinilhuijtoya inintatahua ma calaquica huan ma moaxcatica. 24 Huajca elque ininconeuhua catli hualajque ipan ni tlali huan moaxcatijque. Inixpa tiqintlanque nopa cananeos catli achtihuiya itztoyaj nica. Tiquinmactili israelitame inintlanahuatijcahua cananeos ininhuaya ininmasehualhua para ma quinchihuilica catli inijuanti quinequisquáaj. 25 Huan inijuanti calajque campa altepeme catli más cuali tlasencahuali, huan ipan tlalme catli más cuali. Moaxcatijque calme catli tejtemitoya ica nochi tlamantli catli más cuali huan amelme catli ya tлахahuali. Moaxcatijque xocomeca milme, huan olivo milme huan milme ica nochi tlamantli cuame catli ya quipiyayayaj inintlajca hasta onmocahua. Huan quicuajque hasta cuali ixhuique, huan hasta motomajque huan tlhuel pajque ica nochi catli cuali tiquinchiuhuijtoya.

26 “Pero masque quej nopa tiquintochijqui, amo mitztlepanitaque. San motzontochonjoque huan amo quinejque quititase motlanahuatilhua. Quinmictijque

motlajtol pannextijcahua catli quinnojnortzayayaj chicahuac para ma moyolcuepaca ica ta. Tlahuel mitzixpanoque. 27 Huajca yeca tiquinmactili ininmaco inincualancaitacahua para ma quintlajiyohuiltica. Huan quema tlajiyohuiyayaj, mitztlajtlanjque xiquinpalehui, huan ta ica mohueyi tlaicnelilis, tiqintlacaquili huan tiquinmacac tlanahuiani para ma quinmaquixtica ininmaco inincualancaitacahua.

28 “Pero quema ya oncayaya se quentzi tlasehuilistli, inijuanti sempa quichihuyayaj catli fiero moixpa huan yeca tiquincajqui ma huetzica ininmaco inincualancaitacahua huan para inijuanti ma quintlana. Huan yeca sempa mitztlajtlanjque motlapalehuil huan ta, tlen ilhuicac, tiqintlacaquili huan pampa tiqintlasojtlac, tiquinmanahui tlen inincualancaitacahua. Huan quej nopa panoc miyac hueltas.

29 “Tiquinilhuiyaya sempa ma quichihuaca catli quijtohua motlanahuatilhua, pero inijuanti tlhuel motlepanitayayaj huan amo quicajque catli tiqinnahuati. Noja más quixpanoque motlanahuatilhua catli quichihua para masehualme ma itztoca ica cuali sintla quitoquiláaj. Pero inijuanti más motzontochonchijque, huan moyoltetilijque huan amo mitztlacaquilijque. 30 Huan para miyac xihuitl tijpixqui hueyi moyolo ica inijuanti. Huan ica motonal tijnequiyaya tiqintlalnamiquiltis pampa tiquinmacac motlajtol pannextijcahua mocamanal para quinilhuisse tlaque inintlajtlacolhua, pero inijuanti amo quinchihuilijque cuenta. Huajca yeca tiquinmactili sempa ininmaco inincualancaitacahua ipan ni tlali para ma quintlatzacuiltica. 31 Pero pampa ta tlhuel titetlasojtla, amo tiqintzontlamilti, niyon amo tiquin tlhuelcajqui pampa ta tiToteco Dios catli hueyi moyolo huan tlhuel titeicnelía.

32 “Toteco Dios, ta catli tihueyi huan tijiya hueyi mochicahualis. Ta catli titemajmati huan tijtlamichihua nochi catli tijtencahua para tijchihuas, ama na nimitztlajtlania amo xiquelcahua totlajiyohuilis. Amo xiquelcahua quen tlajiyohuijtoque catli to-

tlanahuatijcahua, totlayacancahua, totajtzi-tzi, totlajtol pannextijcahua, tohuejcapan tatahua huan nochi momasehualhua tlen quema nopa Asiria tlanahuatiani techtlan-que huan hasta ama ni tonal. ³³Ta amo motlajtlacol nochi catli techpanotihualajtoc pampa ta tijchijtoc catli xitlahuac huan tojuanti tlahuel titlajtlacolchijtoque. ³⁴Totlanahuatijcahua, totlayacancahua, totajtzitzi huan tohuejcapan tatahua amo quitoquilij-que motlanahuatilhua. Amo quichihuilijque cuenta catli tiquinilhuyaya ma quichihua-ca. ³⁵Quema ajsitoj ipan inintlal huan quipixque inintlanahuatijcahua pampa tiquintiochijqui miyac, amo mitzhueyitalijque. Masque tiquinmacac ininmaco hueyi tlali catli miyac itlajca, amo quicajque inintlajtlacolhua.

³⁶“Huan ama timocueptoque titetequipanohuani ipan ni cuali tlali catli tiquinmacac tohuejcapan tatahua para ma quicuaca nochi catli cuali quiyiya. ³⁷Pero ama nochi cuatlaclti catli onca mocahua para tlanahuatiani catli ta tiquintlalijtoc para technahuatise por totlajtlacolhua. Nojquiya tojuanti totlacayohua huan totlapiyalhua tiitztoque ininmaco para ma techchihuilica catli quinequij huan yeca miyac titlajiyohuaj.

Inintoca catli motemacaque para quitequipanose TOTECO

³⁸“Pero masque nochi ni tlamantli panotoc, ama tojuanti tijchihuaj ni tlajcuiloli campa tojuanti, totlayacancahua, tolevitajhua huan tototajtzitzi timotemacaj para temachtli tijtoquilise motlanahuatilhua huan yeca nochi tojuanti tijtlalfaj totoca ipan ni tlajcuiloli.”

10 Huan nica eltoc totoca tojuanti catli timotocaxtlalijque ipan amatl: Na niNehemías, niicone Hacialías, catli nigobernador.

Huan totajtzitzi catli motocaxtlalijque elque Sedequías, ²Seraías, Azarías, Jeremías,

³ Pasur, Amarías, Malquías.

⁴ Hatús, Sebanías, Maluc,

⁵ Harim, Meremot, Obadías,

⁶ Daniel, Ginetón, Baruc,

⁷ Mesulam, Abías, Mijamín,

⁸ Maazías, Bilgai huan Semaías.

⁹Huan levitame catli motocaxtlalijque elque:

Jesús, icone Azanías, Binúi catli se iixhui Henadad, huan Cadmiel,

¹⁰ ihuaya ininlevita icnihua: Sebanías, Hodías, Kelita, Pelaías, Hanán,

¹¹ Micaía, Rehob, Hasabías,

¹² Zacur, Serebías, Sebanías,

¹³ Hodías, Bani, huan Beninu.

¹⁴Huan motocaxtlalijque tlayacanani ipan nopa masehualme:

Paros, Pahat Moab, Elam, Zatu, Bani,

¹⁵ Buni, Azgad, Bebai,

¹⁶ Adonías, Bigvai, Adín,

¹⁷ Ater, Ezequías, Azur,

¹⁸ Hodías, Hasum, Bezai,

¹⁹ Harif, Anatot, Nebai,

²⁰ Magpías, Mesulam, Hezir,

²¹ Mesezabeel, Sadoc, Jadúa,

²² Pelatías, Hanán, Anaías,

²³ Oseas, Hananías, Hasub,

²⁴ Halohe, Pilha, Sobec,

²⁵ Rehum, Hasabna, Maasías,

²⁶ Ahías, Hanán, Anán,

²⁷ Maluc, Harim huan Baana.

Israelitame quitestigojquetzque Toteco nochi catli quichihuasquíaj

²⁸Huan nochi sequinoc masehualme, nopa sequinoc totajtzitzi, levitame, puerta tlamocuitlahuiani, huicani, tiopa tequipanohuani, huan nochi sequinoc catli moyocatlalijque tlen masehualme catli amo quiiximatij Toteco Dios catli nopona itztoyaj, nochi motemacaque para quitequipanose Toteco Dios ininhuaya ininsihujhua huan ininconeua catli ya hueliyayaj tlamachilíaj, ²⁹nochi mosansejcotilijque huan sentic ininhuaya iniicnihua huan inintlayacancahua tlatestigojquetzque para quitlamichihuase nochi itlanahuatilhua Toteco Dios catli quinmacatoya ica itequipanojca Moisés. Nojquiya tlatestigoj-quetzque para quichihuase nochi camanali, tlamachtilme huan leyes catli TOTECO quinilhujtoc. Huan sintla amo, huajca ini-juanti quiselisquíaj nochi nopa tlatelchihualistli catli quinamiqui quinajsis.

30 Huan nochi nopa masehualme quij-tojque: “Tijcahuaj tocamanal para amo ti-quincahuilise toichpocahua ma monamic-tica ininhuaya tlacame catli amo israelitame, huan nion totelpocahua ininhuaya ichpocame catli amo israelitame. 31 Sintla masehualme catli amo israelitame quihualicase tlamantli para quinemacase ipan sábadó quema timosiyajquetzaj o ipan tlen hueli tonali catli tlatzejtzolotlic para TOTECO, huajca amo tiquintlacohuise. Nojquiya quema ajsi nopa chicome xihuitl tijcahuilise ma mosiyajquetzas nopa tlali huan amo tleno tijtocase huan tiquintlapojpolhuise nochi israelitame catli techtlahuiquilfaj.

32 “Nojquiya tiquijtohuaj para sesen xihuitl ditemacase nahui gramos tlen plata tomi para itiopa Toteco Dios huan nochi itequi. 33 Elis para nopa pantzi catli quixtíaj iixpa, huan para nopa tlacajcahualistli tlen harina, huan nopa tlacajcahualistli tlatlatili catli tlatoctzitzi monequi, huan nopa tlacajcahualistli ipan tonali para ma timosiyajquetzaca, huan quema yancuic metztli, huan nochi nopa ilhuime catli yaya quitlalijtoc. Nojquiya elis para gastos ica tlamantli tlatzejtzolotique, huan nopa tlacajcahualistli para tlajtlacolli para quixtzacuas totlajtlacolhua tiisraelitame iixpa, huan nochi sequinoc tlamantzitzi catli monequi motequihuis ipan itiopa Toteco Dios.

34 “Nojquiya timahuiltijtoque ica nopa piltetzitzi para tijmatise catlique familia tlen totajtzitzi, tolevita icnihua o sequinoc tiisraelitame techtocarohua para ma tijhuicaca cuahuilil huan ipan catlique tonal ipan sesen xihuitl monequi tijhuicase nopa cuahuilil para quitlatise ipan itlaixpa Toteco Dios quen yaya tlanahuati ma tijchihuaca ipan itlanahuatilhua.

35 “Nojquiya sesen xihuitl titlategojquetzaj para tijhuicase ipan itiopa TOTECO itlajca catli achihui quisa tlen totlatochua huan inintlajca catli achihui temaca nochi cuame catli tijpiyaj.

36 “Nojquiya tiquijtohuaj para tijhuicase ipan itiopa Toteco Dios toachtihui cone, huan iniachtihui conehua tohuacax-

hua huan toborregojhua. Huan tiquinmacase nopa totajtzitzi catli quitequipanohuaj Toteco Dios quen quijtohua nopa tlanahuatilme.

37 “Nojquiya tijhualicase para nopa totajtzitzi nopa achihui harina, nopa achihui cuatlectli tlen sesen cuahuilil, nopa achihui xomeca atl huan nopa achihui aceite hasta campa quiajocuisse ipan tiopamitl. Huan para nopa levitame, tijhuicase se chiquihuitl ipan sesen majtlactli chiquihuitl tlen nochi catli temaca totlal huan ya nopa elis todiezmo. Huan nopa levitame quiselise huan quisentilise ipan nochi topilalpetzitzitzi pampa quej nopa inintequi.

38 “Huan nozona ininhuaya nopa levitame catli quiselíaj diezmos itztos se totajtzitzi catli se iixhui Aarón. Huan se chiquihuitl tlen sesen majtlactli chiquihuime catli quiselise para diezmos tlen tlacualistli, nopa levitame quiajocuisse ipan nopa cuarto ipan itiopa Toteco Dios campa tlaajocuij. 39 Pampa israelitame ininhuaya nopa levitame quinquemacatoc Toteco Dios para quiajocuisse nopa tlacajcahualistli tlen trigo, xomeca atl, huan aceite ipan nopa cali campa quiajocuij nopa tlamantli tlatzejtzolotlic para quitequihuisse totajtzitzi, huan puerta tlamocuitlahuiani huan huicani.

“Huajca nica tijcahuaj tocamanal para amo tijcahuase tijmacase itiopa Toteco Dios catli monequi nozona.”

Nopa yancuic ehuaní ipan altepetl

Jerusalén

(1 Cr. 9:1-34)

1 Nopa tlayacanani tlen israelitame ya mocahuayayaj para itztose ipan altepetl Jerusalén. Pero nochi sequinoc israelitame monejqui mahuiltise ica piltetzitzi para quuitase ajqueya más itztocuij nozona pampa monequi se ipan sesen majtlactli tlacame mochantis para moca-huas ipan altepetl Jerusalén, nopa altepetl tlatzejtzolotlic para TOTECO. Huan nopa seyoc chicnahui yasquíaj itztotij ipan sequinoc altepeme. 2 Huan sequin tlacame ica ininpaquilis motemacaque para moca-huase altepetl Jerusalén. Huan nochi isra-

elitame quintiochijque pampa quej nopa monequiyaya.

³Huan ya ni inintoca nopa tlayacanani ipan sequinoc estados catli mocahuacoj ipan Jerusalén. Nechca nochi masehualme, totajtztzi, levitame, tiopa tetequipanohuani huan iniixhuihua Salomón itequipanojcahua noja mocajque ipan ininchajchaj ipan miyac pilaltepztzti ipan tlali Judá. Pero sequin masehualme tlen tlali Judá hualajque huan mochantijque ipan altepetl Jerusalén.

⁴Sequin masehualme tlen nopa huejhueyi familias Judá huan Benjamín hualajque para mocahuase ipan altepetl Jerusalén.

Tlen iixhuihua Judá mocajque ipan Jerusalén: Ataías, icone Uzías, catli elqui icone Zacarías, catli elqui icone Amarías, catli elqui icone Sefatías, catli elqui icone Mahalaleel, catli elqui se ipan ifamilia Fares. ⁵Nojquiya hualajqui Maasías, icone Baruc, catli elqui icone Colhoze, catli elqui icone Hazaías, catli elqui icone Adaías, catli elqui icone Joiarib, icone Zacarías, catli elqui icone Siloni.

⁶Huajca ica nochi sequinoc catli iixhuihua Fares catli mocajque altepetl Jerusalén eliyayaj 468 tlacame catli tetique para tlahuilanase.

⁷Tlen iixhuihua Benjamín mocajque ipan Jerusalén: Salú, icone Mesulam, catli elqui icone Joed, catli icone Pedaiás, catli icone Colaías, catli icone Maasías, catli icone Itiel, catli elqui icone Jesaías. ⁸Huan ica Salú mocajque Gabai huan Salai huan sequinoc catli para nochi mochijque 928. ⁹Huan inintlayacanca ipan nopa altepetl elqui Joel, icone Zicri, huan in ompa tlayacanca elqui Judá, icone Senúa.

¹⁰Tlen nopa totajtztzti mocajque ipan Jerusalén: Jedaías, icone Joiarib, Jaquín, ¹¹huan Seraías, icone Hilcías, catli elqui icone Mesulam, catli icone Sadoc, catli icone Meraiot, catli icone Ahitob, catli elqui se tlayacanquetl ipan itiopa Toteco Dios. ¹²Huan injuanti ininhuaya catli tequitiyayaj ipan tiopamitl eliyayaj 822. Nojquiya hualajqui para mocahuas Adaías, icone Jeroham, catli elqui icone Pela-

lías, catli icone Amsi, catli icone Zacarías, catli icone Pasur, catli icone Malquías, ¹³huan ininhuaya nochi iteiximatcahua catli tlayacanani tlen ininchaj ehuan mochihuayayaj 242. Nojquiya hualajqui para mocahuas Amasai, icone Azareel, catli elqui icone Azai, catli icone Mesilemot, catli elqui icone Imer. ¹⁴Huan ihuaya hualajque 128 ihuampoyohua catli quinyacanayayaj ininchaj ehuan huan eliyayaj tlacame catli tlahuel tetique. Huan quinyacanayayaj Zabdiel, icone Gedolim.

¹⁵Tlen nopa levitame mocajque ipan Jerusalén: Semaías, icone Hasub, catli elqui icone Azricam, catli icone Hasabías, catli elqui icone Buni. ¹⁶Huan mocajque Sabetai huan Jozabad catli eliyayaj tlayacanca levitame, catli quinquimacatoyaj para quiyacanase nochi tequitl calteno ipan itiopa Toteco Dios. ¹⁷Huan mocajqui ipan Jerusalén Matanías, icone Micaía, catli elqui icone Zabdi, catli icone Asaf. Yaya catli motlatlajti quema quipehualti sesen culto para quitlascamatise Toteco Dios. Nojquiya mocajqui Bacbuquías catli nopa ompa para tlayacanas huan teipa Abda, icone Samúa, catli elqui icone Galal, catli elqui icone Jedutún. ¹⁸Huajca nochi ni levitame catli mocajque ipan altepetl Jerusalén mochijque 284.

¹⁹Tlen nopa puerta tlamocuitlahuiani mocajque ipan Jerusalén: Acub, Talmón huan iniicnihua catli nojquiya quimocuitlahuijque puertas. Huan ica nochi mochijque 172.

Nopa masehualme catli itzttoyaj ipan sequinoc altepeme

²⁰Huan nopa sequinoc israelitame, totajtztzti huan levitame mochantijque ipan sequinoc altepeme ipan tlali Judá campá quiselijtoyaj tlali tlen ininhuejcapan tathua. ²¹Pero nopa tlacame catli tequipanohuayayaj tiopan calijtic mochantijque ipan nopa tepetl Ofel nechca Jerusalén. Inintlayacancahua eliyaya Ziha huan Gispá.

²²Huan nopa tlayacanquetl tlen levitame catli itzttoyaj ipan Jerusalén eliyaya Uzi catli elqui icone Bani, catli elqui

icone Hasabías, catli icone Matanías, catli icone Micaía, catli elqui se iixhui Asaf. Huan nochi iixhuihua Asaf itztoyaj huicani ipan tiopamitl. ²³Huan nopa huicani mocajque imaco tlanahuatili catli hualajqui tlen nopa tlanahuatijquetl ipan tlali Persia. Huan nopa tlanahuatijquetl quinnahuatiyaya catli quichihuas-quíaj mojmostla.

²⁴Huan Petaías, icone Mesezabeel, catli elqui se tlen iixhuihua Zera, catli elqui icone Judá, yaya elqui itequipanojca nopa tlanahuatijquetl para quitas nochi tlamantli ica israelitame.

**Nopa masehualme catli itztoyaj
ipan sequinoc pilaltepztitzi**

²⁵Huan sequin iixhuihua Judá mocajque para itztose ipan altepeme Quiriat Arba, Dibón huan ipilaltepztitzi, Jecabseel huan ipilaltepztitzi, ²⁶Jesúa, Molada, Bet Pelet, ²⁷Hazar Sual, Beerseba huan ipilaltepztitzi, ²⁸Siclag, Mecona huan ipilaltepztitzi, ²⁹Enrimón, Zora, Jarmut, ³⁰Zanoa, Adulam huan ininpilaltepztitzi, Laquis huan imilhua huan Azeca huan ipilaltepztitzi. Huajca iixhuihua Judá mochantijtoyaj tlen altepetl Beerseba hasta nopa tlamayamitl catli itoca Hinom.

³¹Huan injuanti catli eliyayaj ipan nopa hueyi familia tlen iixhuihua Benjamín mochantijque ipan altepeme: Geba, Micmas, Aía, Betel huan ipilaltepztitzi, ³²Anatot, Nob, Ananías, ³³Hazor, Ramá, Gitaim, ³⁴Hadid, Seboim, Nebalat, ³⁵Lod, Ono huan ipan nochi nopa tlamayamitl campa itztoyaj nopa tlaceh catli quipixque miyac yajatili para quichihuae miyac tlamantli.

³⁶Huan quintitlanque sequin levitame catli itztoyaj ipan tlali Judá para ma itztotij ipan inintlal iixhuihua Benjamín.

**Totajztitzi huan levitame catli hualajque
ihuaya Zorobabel**

12 Ya ni techilhuía catli totajztitzi huan levitame mocuepque ihuaya Zorobabel, icone Salatiel, huan ihuaya Jesús. Inintoca nopa totajztitzi elque:

- Seraías, Jeremías, Esdras,
- ² Amarías, Maluc, Hatús,
- ³ Secanías, Rehun, Meremot,
- ⁴ Iddo, Gineto, Abías,
- ⁵ Mijamín, Maadías, Bilga,
- ⁶ Semaias, Joiarib, Jedaías,
- ⁷ Salú, Amoc, Hilcías, huan Jedaías.

Nochi ya ni eliyayaj tlayacanani tlen totajztitzi huan inintlapalehuijcahua ipan nopa tonali quema tequitiyaya Jesús.

⁸Huan nopa levitame catli mocuepque ininhuaya elque: Jesús, Binúi, Cadmiel, Serebías, Judá huan Matanías catli ica ihuampoyohua tlayacanayayaj ipan huicatl para quitlascamatise TOTECO ipan tlasentililistli. ⁹Nojquiya iniciñhua Bacbuquías huan Uni moquetzayayaj iniixmelac huan tlapalehuiyayaj ipan tlasentililistli.

- ¹⁰ Nopa hueyi totajtzi Jesús quipixqui itelpoca, Joiacim.

Joiacim elqui itata Eliasib.

Eliasib teipa elqui itata Joiada.

- ¹¹ Joiada teipa elqui itata Jonatán.
- Jonatán teipa elqui itata Jadúa.

**Totajztitzi quema Joiacim elqui hueyi
totajtzi.**

¹²Nica eltoc inintoca nopa tlayacanca totajztitzi catli quinyacanayayaj ininhueyi familia tlen totajztitzi huan tequitque imaco Joiacim quema yaya eliyaya hueyi totajtzi:

Meraías quinyacanayaya ichaj ehuaní Seraías.

Hananías quinyacanayaya ichaj ehuaní Jeremías.

- ¹³ Mesulam quinyacanayaya ichaj ehuaní Esdras.

Johanán quinyacanayaya ichaj ehuaní Amarías.

- ¹⁴ Jonatán quinyacanayaya ichaj ehuaní Melicú.

José quinyacanayaya ichaj ehuaní Sebanías.

- ¹⁵ Adna quinyacanayaya ichaj ehuaní Harim.

Helcai quinyacanayaya ichaj ehuaní Meraiot.

- ¹⁶ Zacarías quinyacanayaya ichaj ehuaní Iddo.

Mesulam quinyacanayaya ichaj ehua-
ni Ginetón.

17 Zicri quinyacanayaya ichaj ehua-
ni Abías.

Piltai quinyacanayaya ichaj ehua-
ni Miniamín huan Moadías.

18 Samúa quinyacanayaya ichaj ehua-
ni Bilga.

Jonatán quinyacanayaya ichaj ehua-
ni Semaías.

19 Matenai quinyacanayaya ichaj ehua-
ni Joiarib.

Uzi quinyacanayaya ichaj ehua-
ni Jedaías.

20 Calai quinyacanayaya ichaj ehua-
ni Salai.

Eber quinyacanayaya ichaj ehua-
ni Amoc.

21 Hasabías quinyacanayaya ichaj ehua-
ni Hilcías

huan Natanael quinyacanayaya ichaj
ehua-
ni Jedaías.

22 Quema Darío tlanahuatitoyaya ipan
tlali Persia quichijque se lista ica inintoca
nopa tlayacanani tlen familias tlen levita-
me huan totajtzitzi. Quichijque ipan nopa
tonali quema Eliasib, Joiada, Johanán
huan Jadúa eliyayaj huejhuéyi totajtzitzi.
23 Huan nopa tlayacanca levitame quij-
cuilojque inintoca ipan se amatlapohuali
hasta ipan nopa tonali quema itztoya hue-
yi totajtzi Johanán, icone Eliasib.

24 Huan nopa levitame catli tlayacana-
ni elque: Hasabías, Serebías huan Jesús,
icone Cadmiel. Huan iniicnihua catli san
se ininchaj ehua-
ni moquetzayayaj iniix-
melac ipan nopa tlasentlilistli para quipa-
quilismacase huan quitlascamatise Toteco
Dios quema quintocarohua tequitise. Quej
nopa tlapalehuiyayaj quen huejcayja tla-
nahuatitoyaya David catli elqui itequipa-
nojca Toteco Dios.

25 Huan Matanías, Bacbuquías, Oba-
días, Mesulam, Talmón huan Acub eliya-
yaj puerta tlamocuitlahuani. 26 Inijuanti
tequipanojque quema Joiacim, icone Je-
súa huan iixhui Josadac, eliyaya hueyi to-
tajtzi, huan na niNehemías nieliyaya go-
bernador, huan Esdras eliyaya totajtzi
huan tlamachtijquetl.

**Ilhuichijque pampa ya quisencajque
nopa tepamitl**

27 Quema ajsic tonali para quiyocatla-
lise para TOTECO nopa yancuic tepamitl
para altepetl Jerusalén catli ya quitlami-
cualchijchitoyaj, huajca quintemojque
nochi levitame ipan campa huéli altepeme
huan quinhualicaque hasta altepetl Jeru-
salén para tlapalehuise ipan nopa ilhuitl.
Quinejque ma quihueyichihuaca TOTECO
ica paquilistli, huan ica huicatl para qui-
tlascamatise, huan ica tlatzotzonali ipan
panderos, arpas, huan liras. 28 Huan noj-
quiya hualajque nopa levita huicani catli
itztoyaj ipan pilaltepetztzi nechca Jerusa-
lén huan ipan nopa altepeme tlen nopa ne-
tofatitame. 29 Huan nojquiya hualajque
huicani tlen Gilgal, tlen nopa mili nechca
Geba huan tlen Azmavet pampa nochi ca-
tli huicani mochantitoyaj yahualtic alte-
petl Jerusalén. 30 Achitihui nochi nopa to-
tajtztzi huan levitame motlapajpacchij-
que. Huan nojquiya quintlapajpacchijque
nochi israelitame, huan nopa puertas tlen
nopa altepetl huan nopa tepamitl.

31 Teipa niquinnahuati tequitini ipan
tlali Judá ma tejcoca itzonatipa nopa te-
pamitl. Huan niquintlali ome pamitl tlen
huicani. Nopa achitihui pamitl nejnenque
ica inejmac itzonatipa nopa tepamitl has-
ta nopa Tlasoli Puerta. 32 Huan Osaías
quintoquili ica tlajco nopa tequitini tlen
tlali Judá, 33 inihuaya Azarías, Esdras,
Mesulam, 34 Judá, Benjamín, Samaías
huan Jeremías. 35 Huan quintoquilijque
sequin totajtztzi catli quipitzayayaj tlapit-
tzali. Teipa yajqui Zacarías, icone Jona-
tán, catli elqui icone Semaías, catli elqui
icone Matanías, catli elqui icone Micaías,
catli elqui icone Zacur, catli elqui icone
Asaf. 36 Huan inintepotzco yajque Zaca-
rías iicnihua, Semaías, Azarael, Milalai,
Gilalai, Maai, Natanael, Judá huan Hana-
ni catli tlatzotzonayayaj ica itlatzotzonal-
hua David catli huejcayja eliyaya itequi-
panojca Toteco Dios. Huan nopa tlamach-
tijquetl Esdras quinyacanayaya. 37 Huan
quema ajsitoj campa nopa Ameli Puerta
quisenhuiquilijque nejnenque huan tejco-
que ipan nopa ojtli tlen escalones catli yo-

hui hasta campa itoca Ialtepe David. Teipa tlejcoque campa ixtlejco nopa tepamitl huan panoque ica huejcapa ichaj David hasta nopa Atl Puerta ica campa hualquisa tonati.

³⁸ Huan nopa seyoc pamitl tlen huicani nejnenque ica iopochco, huan na niNehemías, niyohuiyaya iniica, itzonatipa nopa tepamitl ica ne seyoc tlajco masehualme. Huan tijpanoque nopa tetzoptli catli itoca Horno Torre, huan hasta campa más patlahuac nopa tepamitl. ³⁹ Huan tijpanoque itzonatipa nopa Efraín Puerta, nopa Sosolitic Puerta, nopa Michi Puerta, nopa tetzoptli itoca Torre tlen Hananeel, huan nopa seyoc tetzoptli catli itoca Torre tlen Hamea. Teipa tijpanoque hasta nopa Borego Puerta huan timoquetzatoj campa Caltlatzactli Puerta. ⁴⁰ Huan teipa nochi ome pamitl tlen huicani huan na huan tlajco nopa tequitini tiyajque hasta itiopa Toteco Dios campa timoquetzatoj.

⁴¹ Tinejnemiyayaj ininhuaya nopa totajtzitzi catli tlapitzayayaj catli inintoca: Eliacim, Maaseías, Miniamín, Micaías, Elioenai, Zacarías huan Hananías, ⁴² huan nopa huicani catli huicayayaj chichahuac catli inintoca: Maasías, Semafías, Eleazar, Uzi, Johanán, Malquías, Elam huan Ezer. Huan Izrahías quinyacanayaya.

⁴³ Huan ipan nopa tonal quitlatijque miyac tlacajcualistli para Toteco huan nochi paquiyayaj miyac pampa Toteco Dios quinmacatoya se hueyi paquilistli. Hasta nojquiya sihuame huan coneme tlahuel paquiyayaj huan nopa tlahuejchihualistli tlen paquilistli ipan altepetl Jerusalén quicaquiyayaj hasta huejca.

**Nehemías quiyancuili nochi itequi
nopa tiopamitl**

⁴⁴ Huan ipan nopa tonal quintlalijque tlacame para quimocuitlahuise nopa cali campa quiajocuisse nopa nemactli, nopa achtihui pixquistli huan nopa diezmos catli quihualicayayaj masehualme. Monequi quisentilise tlen nochi milme ipan nochi altepeme catli itlanahuatilhua Moisés quijto pampa ya nopa quintocaró nopa totajtzitzi huan levitame. Huan nopa mase-

hualme tlen tlali Judá paquiyayaj para temacase pampa nopa totajtzitzi huan levitame quinquipanohuayayaj. ⁴⁵ Huan nopa totajtzitzi, huan levitame, ininhuaya nopa huicani, huan puerta tlamocuitlahuiani quihueyichijque Toteco Dios huan motlapajpacchijque quen quijto nopa tlanahuatilme catli David huan Salomón quinmacaque. ⁴⁶ Pampa hasta huejcayya quema itztoyaj David huan Asaf, itztoyaj tlayacanani catli quinyacanayayaj huicani para quihueyichihuase huan quitlascamatilise Toteco Dios.

⁴⁷ Huajca ipan ni tonali quema Zorobabel huan na, niNehemías, titlayacanayayaj, nochi israelitame quihualicayayaj nopa tlacualistli catli mojmosta monequiyaya para nopa huicani huan nopa puerta tlamocuitlahuiani huan nojquiya para nopa levitame. Huan nopa levitame teipa quiyocatlaliyayaj se diezmo para iteipan ixhuihua Aarón, nopa totajtzitzi ma quitequihua.

**Nopa cuali tlamantli catli pejque
quichihua**

13 Huan ipan nopa tonali quema quipohuayayaj tlamiyacapa iniixpa nopa israelitame iamatlaphual Moisés, quipantijque ijcuilijtoc ipan nopa amatl para niyon se amonita o moabita masehuali amo quema huelis mosentilis ininhuaya imasehualhua Toteco Dios. ² Quej nopa elqui pampa amonitame huan moabitame amo quisque para quinnamiquiquij israelitame ica catli quicuase huan catli quijise huejcayya. Quinchihuilijtosquíaj israelitame catli cuali, pero amo ya nopa quichijque. Inijuanti quitlaxtlahuijque Balaam para ma quintelchihua israelitame. Pero Toteco Dios quicuepqui nopa tlatelchihuali ica tlatiochihuali. ³ Huajca quema quicajque ni tlanahuatili quiniyo-caquixtijque nochi catli amo nelía israelitame.

⁴ Pero quema ayamo quicaquiyayaj ni tlanahuatili, nopa hueyi totajtzitzi Eliasib quipixqui imaco nochi cuartos huan tlamantli catli quihualicayayaj ipan itiopa Toteco Dios. Huan yaya moiximatiyaya

ica Tobías. ⁵Huan Eliasib quicualchijchi-huilijtoya se cuarto hueyi ipan itiopa Toteco Dios huan quicahuili imaco Tobías para quitequihuis quema quinequi. Nopa cuarto elqui campa achtihiya quiajocuiyayaj harina para tlacajcahualistli, huan copali, huan nochi tepos tlamantzitzi catli motequihuiyayaj ipan tiopamitl. Nozona quicahuayayaj nopa diezmos tlen trigo, xocomeca atl huan aceite quen elqui tlanahuatili para quinmacase nopa levitame, huicani, puerta tlamocuitlahuiani huan totajtzitzi. ⁶Quema panoc nochi ya ni, amo niitzoaya altepetl Jerusalén pampa quema Tlanahuatijquetl Artajerjes ipan tlali Babilonia yohuiyaya para 32 xihuitl tlanahuatis, na nimocuepqui nozona ipan nopa caltlanahuatili para nijtequipanos. Pero teipa nijtlajtlani ma nechcahua sempa nihualas ipan altepetl Jerusalén, ⁷huan yaya nechcajqui huan nihualajqui altepetl Jerusalén. Huan quema niajsico ipan Jerusalén huan nijmatqui Eliasib quichijtoya catli fiero huan quimacatoya se cuarto Tobías ipan itiopa Toteco Dios, ⁸huajca tlahuel nicualanqui. Huan nijquixti nochi itlamantzitzi Tobías ipan nopa cuarto. ⁹Huan nitlanahuati para ma quitlapajpacchihuaca nopa cuarto huan sempa ma quitlalica nozona nopa tepos tlamantzitzi catli motequihuíaj ipan itiopa Toteco Dios, huan nopa harina para tlacajcahualistli huan nopa copali.

¹⁰Nojquiya nijpanti para ayacmo quinmacatoyaj inintlacualis levitame huan huicani quen quinamiquiyaya. Yeca nochi injuanti mocueptoyaj ipan sesen inialtepehua para tequitise ipan ininmil. ¹¹Huajca niquinajhuac nopa tequitini huan niquinilhui: “¿Quenque anquitlahuelcajtoque itiopa Toteco Dios?” Teipa niquinsentili nochi nopa levitame huan huicani, huan sempa niquintlali campa quintocarrohua para tequipanose. ¹²Huajca nochi israelitame ipan tlali Judá sempa pejqe quihualicaj inidiezmos tlen trigo, tlen xocomeca atl huan tlen aceite para quiajocuisse. ¹³Huan niquintequimacac nopa totajtzi Selemías, huan nopa tlamachtijquetl Sadoc, huan nopa levita Pedías para ini-

juanti ma quimocuitlahuica nopa cuartos campa quiajocuij nochi tlamantli. Huan nojquiya nijtequitlali Hanán, icone Zacur huan iixhui Matanías, para quinpaléhuis. Nochi niquinitac para tlamace catli temachme. Huan inintequi elqui para quinmajmacase tlcualistli ininlevita icnihua. Huan nimotlatlajti: ¹⁴“NoTeco Dios, xiquelnamiqui ni tlamantli catli cuali catli nijchijtoc, huan amo xiquelcahua nopa sequinoc tlamantli catli nijchijtoc para motiopa huan nochi tequitl catli mochijtoc nozona.”

Quiixpanoque nopa tonal sábado

¹⁵Ipan nopa tonali nojquiya niquitac para miyaqui masehualme ipan tlali Judá tequitiyayaj ipan sábado. Quixacualohuayayaj xocomecatl para quiquixtise iayo, huan quihualicayayaj tlamamali tlen trigo huan quinmamaltiyayaj ininburrojhua. Nojquiya ipan sábado quihualicayayaj xocomeca atl, xocomecatl, higos huan nochi catli quipixque altepetl Jerusalén para quinemacaquij. Huajca niquinajhuac pampa tlanemacayayaj ipan sábado. ¹⁶Huan nojquiya itztoyaj sequin tlamace tlen altepetl Tiro catli quinhualicayayaj michime huan miyac tlamantzitzi para quintlanemaquiltise israelitame ipan sábado. ¹⁷Huajca niquinajhuac nopa tequitini tlen tlali Judá huan niquinilhui:

—Tlahuel fiero catli anquichihua pampa anquixpanoj ni tonal para timosiyajquetzase. ¹⁸¿Amo anquimatij para quej nopa quichijque tohuejcapan tatahua huan yeca Toteco Dios techhualiquilijtoc nochi ni tlaijiyohuillistli ipan tojuanti huan toaltepe? Huan ama ichi más anquihueyilíaj icualancayo Toteco Dios para tiisraelitame pampa hueyi anquixpanoj ni tonal sábado.

¹⁹Huajca na nitlanahuati para sesen viernes ica tiotlac quema pehuayaya nopa tonal para timosiyajquetzase, ma quitzacuaca nopa huejhueyi puertas ipan nopa tepamitl tlen toaltepe. Huan niquinilhui amo ma quitlapoca hasta quema panotos sábado. Huan nojquiya niquintlali notequipanojcahua para ma tlamocuitlahuica

huan amo aqui ma quicahuilica calaquis ipan sábadó ica itlamamal para quinemas. ²⁰Huajca se ome hueltas nopa tlancamaci monejqui tonilis calteno itepa al tepetl Jerusalén. ²¹Huan na niqinajhuac chicahuac huan niqinilhui: “¿Para tlen anmochijtoque nechca itepa ni altepetl? Sintla sempa anquichihuase, nimechtzacuas.” Huajca ayacmo quema hualajque ipan sábadó. ²²Teipa niqinnahuati catli levitame ma motlapajpacchihuaca huan ma tlamocuitlahuica ipan puertas para amo aqui ma quiixpano nopa sábadó para mocahuas tlatzejtzolotit nopa tonal para Toteco Dios. Huan nimotlatlajti: “NoTeco Dios, xiquelnamiqui nojquiya inin catli nijchijtoc. Techtlasojtla ica mohueyi tlaicnelil.”

²³Ipan nopa tonali nojquiya nimomacac cuenta para miyaqui israelitame monamictijtoyaj ininhuaya sihuame catli amo israelitame catli hualajque tlen tlamme Asdod, Amón huan Moab. ²⁴Huan quen tlajco ininconeua camanaltiyayaj inincamanal masehualme tlen Asdod huan amo hueliyayaj camanaltij tocamanal titlali Judá ehuaní. ²⁵Huajca niqinixnamijqui huan niqintelchijqui. Huan sequin niqinmaquili huan niqintzoncalhuihuilitlac. Huan niqinchijqui ma quites-tigojquetzaca Toteco Dios para ayacmo monamictise ininhuaya, niyon temacase iniichpocahua para ma monamictica inin-

huaya catli amo israelitame. ²⁶Huan nojquiya niqinilhui: “Ya ni nopa tlajtlacoli catli quichijqui Tlanahuatijquetl Salomón tlen tlali Israel. Amo oncayaya seyoc tlanahuatijquetl quen ya ipan seyoc tlali. Huan Toteco Dios tlahuel quiicneli huan quichijqui tlanahuatijquetl ipan nochi tlali Israel, pero yaya huetzqui ipan tlajtlacoli por nopa sihuame catli seyoc tlali ehuaní catli mocuili. ²⁷Amo timechcahuilise anquichihuase ni hueyi tlajtlacoli huan anquiixpanose Toteco Dios. Amo hueli anmocuilise catli amo israelitame.” Quej nopa niqinilhui.

²⁸Huan se icone Joiada catli elqui icone nopa hueyi totajtzi Eliasib mosihuajtijtoya ica iichpoca Sanbalat huan mochijqui imontica Sanbalat nopa horonita tlatcatl. Huajca nijquixti para amo quema huelis nechnechcahuis sempa. Huan nimotlatlajti: ²⁹“NoTeco Dios, xiquelnamiqui nopa totajtzitzi huan levitame catli tlajtlacolchijtoque huan quimahuispolojtoque inintequi.”

³⁰Huan quej nopa niqinixti nochi catli amo israelitame. Huan niqintequimacac totajtzitzi huan levitame sesen ini-juanti campa quintocarohua. ³¹Huan nojquiya nijmocuitlahui nochipa para nochi tlacame quihualicase cuahuitl para tlaixpamitl quema quitocarosquía. Huan nijmocuitlahui para quihualicase iachtihui tlajca ininmilhua. Huan nimotlatlajti: “Techelnamiqui ica cuali, NoTeco Dios.”